

**Uunga siunnersuut: Folketingip Ombudsmandia pillugu inatsisip  
allanngortinneqarnissaa pillugu inatsisit assigiinngitsut Kalaallit Nunaannut  
atuutilersinneqarnissaannut peqqussut pillugu Inatsisartut aalajangiiffigisassaattut  
siunnersuut**

**Inatsisinut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Aqqalu Jerimiassen, Atassut, siulittaasup tullia  
Inatsisartunut ilaasortaq Mala Høy Kúko, Siumut  
Inatsisartunut ilaasortaq Harald Bianco, Inuit Ataqtigiit  
Inatsisartunut ilaasortaq Asii Chemnitz Narup, Inuit Ataqtigiit

Ulloq 11. oktober 2022-mi siullermeerinninnerup kingorna ataatsimiititaliap siunnersuut misissorpaa.

**Siunnersuutip imarisaa siunertaalu**

Folketingip Ombudsmandia pillugu inatsit, kiisalu tamassuma allannguutaa 1. januar 1997-imi aamma 1. januar 2007-imi atuutilerminniit Kalaallit Nunaanni atuutsinneqalerput. Ombudsmandi pillugu inatsit kingorna marloriarluni allanngortinneqarpoq. Danmarkimili piffissap ingerlanerani Ombudsmandi pillugu inatsit allanngortinneqarnikuuvoq. Allannguutit taakku Kalaallit Nunaanni Folketingip Ombudsmandianut malittarisassanut atuuttunut allannguinnissamik pisariaqalersitsipput.

Allannguutit ukununnga attuumassuteqarput:

- FN-ip isumaqatigiissutaani naalliutsitsinermut allatigulluunniit peqqarniitsumik, atussaangitsumik nikassaasumilluunniit pineqarnissamut pillarneqarnissamulluunniit allattaavik (protokol) malinneqarsinnaasoq naapertorlugu nunami pinaveersaartitsinissaq siunertaralugu Folketingip Ombudsmandia 2007-mi toqqarneqarpoq.
- Ombudsmandip Meeqqanut Allaffiata pilersinneqarnera kiisalu Folketingip

Ombudsmandiata ukiuni qulini atuussinnaatitaaneranut aalajangiinermut tunngasoq.

Tamatuma saniatigut inatsimmut allannguutinullu atuuttunut tunngatillugu peqqussut Ombudsmandip Kalaallit Nunaanni sulinerata ersarissarniarlugu pisortatigut aqutsinermi naalagaaffeqatigiinnermit isumagineqartortai inatsisini attuumassuteqartuni taamaallaat iluarsivigineqarlutik.

### **Tusarniaanermut akissutit**

Siunnersuut novembarip ulluisa 17-ianniit 2021 decembarip ulluisa 15-iannut 2021 tamanut ammasumik tusarniaassutigineqartoq Inatsisartut aalajangigassaattut siunnersuummi allassimavoq. Allaqqanngilarli qanoq tusarniaaneq ingerlanneqarsimanersoq, kikkut tusarniaavigineqarsimanersut, kikkullu tusarniaanermut akissuteqarsimanersut imaluunniit siunnersuut tusarniaavimmut ilineqarsimanersoq.


### **Ataatsimiititaliap siunnersuummik suliarinninnera**

Inatsisip allannguutaa suliassaqarfimmi Naalagaaffiup iluani inatsisitigut inissisimanermi inatsisit assigiilernerannik kinguneqartussaammat ataatsimiititaliap pitsaasutut isigaa.

### **Ataatsimiititaliap inassuteqaatai**

Ataatsimiititaliap isumaqatigiittup siunnersuutip akuersussutigineqarnissaa inassutigaa.


Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Anders Olsen  
Siulittaasoq



Aqqalu Jerimiassen  
Siulittaasup tullia



Mala Høy Kúko



Harald Bianco



Asii Chemnitz Narup